



Bergen, 30.12.1987
HY/MN

FORSKRIFT OM REGULERING AV REKEFISKET VED VEST- OG AUST-GRØNLAND
I 1988.

Fiskeridepartementet har 28. desember 1987 med heimel i lov av 3. juni 1983 nr. 40 om saltvannsfiske m.v. §§ 4 og 5 og i lov av 16. juni 1972 nr. 57 om regulering av deltagelsen i fiske § 6 femte ledd, fastsett denne forskrifta:

§ 1

Det er forbode å fiske reker ved Vest-Grønland (NAFO-område 1) og i den grønlandske sona ved Aust-Grønland (ICES-område XIV og Va).

Utan hinder av forbodet i første ledd kan norske farty som er tildelt kvote i 1988 fiske 450 tonn reker ved Vest-Grønland i NAFO-område 1 sør for 68° n.br. og 2050 tonn reker i den grønlandske sona ved Aust-Grønland i ICES-områda XIV og Va.

§ 2

Totalkvoten på 2050 tonn ved Aust-Grønland skal fordelast på dei deltagande farty etter inndeling i følgjande grupper på grunnlag av godkjend lastekapasitet:

- a) under 80 tonn
- b) 80 tonn til 99,9 tonn
- c) 100 tonn til 129,9 tonn
- d) 130 tonn til 159,9 tonn
- e) 160 tonn til 199,9 tonn
- f) 200 tonn og meir

Fartykvotane blir utrekna slik: 50% av totalkvoten blir delt med likt kvantum på kvart farty. Dei resterande 50% blir delte på fartya etter den gjennomsnittlege lastekapasiteten i gruppene.

Ikkje noko farty kan tildelast ein fartykvote som er større enn fartyet sin godkjende lastekapasitet.

§ 3

Totalkvoten på 450 tonn ved Vest-Grønland skal delast på farty som er registrert hos Fiskeridirektøren for deltaking i fisket ved Vest-Grønland i 1988. Dersom den samla godkjende lastekapasiteten til dei registrerte fartya overstig 450 tonn, skal kvoten delast ved loddtrekning til 4 av dei registrerte



fartya med 112,5 tonn til kvart farty.

Dersom nokon av dei uttrekte fartya har ein godkjend lastekapasitet som er mindre enn 112,5 tonn, skal fartyet sin kvote setjast lik den godkjende lastekapasiteten.

Den resterande delen av den norske totalkvoten skal då delast i høve til storleiken på lastekapasiteten til dei uttrekte fartya med godkjend lastekapasitet større enn 112,5 tonn.

Dersom den samla godkjende lastekapasiteten til desse 4 fartya er under 450 tonn, kan Fiskeridirektøren tillate deltaking av 5 farty i fisket ved Vest-Grønland. Fartykvotane vil bli fastsett i samsvar med andre og tredje ledd.

Er samla godkjend lastekapasitet for dei 5 fartya over 450 tonn, blir fartykvotane redusert i høve til godkjend lastekapasitet for det einskilde fartyet innafor totalkvoten på 450 tonn.

§ 4

Fiskeridirektøren avgjer under kva gruppe det einskilde deltagande fartyet hører til, og fastset kvoten til det einskilde fartyet ved Vest-Grønland og Aust-Grønland.

Ved fastsetting av kvotar etter § 3 kan det gjerast slike justeringar som praktiske omsyn tilseier.

§ 5

Deltakande farty skal melde frå til Fiskeridirektøren før avgang til feltet, og skal sende kopi til Fiskeridirektøren av dei meldingane om innseiling i sona, vekefangst og utseiling frå sona som dei er pålagde å sende etter gjeldande fiskerireglar i grønlandsk sone.

I den grønlandske sona ved Aust-Grønland kan ikkje fleire enn 15 farty fiske samstundes. For å gjennomføre denne avgrensinga i deltakinga i fiske etter reke ved Aust-Grønland kan Fiskeridirektøren forby farty å gå inn i sona, påleggje farty å gå ut av sona og inndele fartya i puljer eller tildele fartya tørnnummer. Vidare kan Fiskeridirektøren fastsetja siste frist for innseiling i grønlandsk sone.

§ 6

Fiskeridirektøren kan fastsetje dato som siste frist for å starte fisket ved Aust-Grønland. Farty som ikkje har starta fisket innan ein slik fastsett frist, misser den kvoten som er tildelt etter §§ 2, 3 og 4.



Den del av den norske totalkvoten på 2050 tonn som var tildelt farty som ikkje starta fisket innan fristen skal delast i samsvar med reglane i §§ 2 og 4 på dei fartya som har starta fisket ved Aust-Grønland. Farty som på grunn av havari blir hindra frå å starte fisket ved Aust-Grønland innan fristen, kan etter søknad også takast med ved fordelinga av kvoter etter denne paragrafen.

Fiskeridirektøren kan oppheve fartykvotane ved Aust-Grønland fastsett etter §§ 2 og 4. Etter at fartykvotane er oppheva kan Fiskeridirektøren fastsetje forskrift om:

1. at deltakande farty kan fiske fritt fram til den totale kvoten på 2050 tonn er oppfiska eller
2. at restkvoten blir delt med likt kvantum på kvar av dei deltakande farty.

Dersom restkvoten blir delt likt på dei deltakande farty kan Fiskeridirektøren fastsetje ein siste frist for å starte fisket. Farty som ikkje overheld fristen misser den tildelte kvote.

Dersom storleiken på restkvoten eller talet på innvilga lisenser tilsier at ferre farty enn dei som har meldt seg interesserte kan delta, kan Fiskeridirektøren avgjere kven som skal få løyve til å fiske.

§ 7

Blir fartykvotane etter §§ 3 og 4 ved Vest-Grønland (NAFO-området 1) ikkje utnytta innan 15. august 1988 kl 2400 GMT, blir kvotetildelingane oppheva, og den resterande del av totalkvoten blir delt med likt kvantum på farty som er på feltet.

§ 8

Fiskeridirektøren kan fastsetje nærmere forskrift om gjennomføring og utfyllig av reglane i denne forskriften, under dette også forskrift om dagleg rapporteringsplikt, prøvetaking og tidspunkt for stopp i fisket når det blir utrekna at kvotane er oppfiska.

§ 9

Brot på reglane i denne forskriften eller på reglar gitt med heimel i denne forskriften blir straffa etter reglane i lov av 3. juni 1983 nr. 40 om saltvannsfiske m.v. § 53.

§ 10

Denne forskriften blir sett i kraft straks, og gjeld til og med 31. desember 1988.
